

NÚMEROS

Moisés sacerdote Yuusan takarin artinan pegkernum chicharkamu

6 ²²Yuus Moisésan chicharuk: ²³Aarón nina uchiri ainajai israelita ainan pegkernum chichareakka jutikas titatui: ²⁴Yuus atumnaka pegkernum yainmak ayamrutmakti. ²⁵Yuus atumnaka wait anentramak pegkera nuna nekamtikramattarme. ²⁶Yuus atumnaka anenmau asa, agkan pujusarti, tusa yainmaktatruma tiarti. ²⁷Sacerdote aina wina pachittsar israelita ainan ujainakaigka israelita ainanka wii pegkernum yaigkartinaitjai, tusa Yuus tinaiti.

Yuragkim utsaanar au weakai israelita ainaka wejakaruiti

9 ¹⁵Yuus ememattasa iruuntain aakmakarua nui nagkama yuragmia numamtin Yuus ememattasa iruuntai aaknum utsaanar asauwaiti. Tura káshika jiya numamtin kea keakua tsawa jakuiti. ¹⁶Yuus ememattasa iruuntai aaknumka tuke tuma jakuiti.

¹⁷Yuus ememattasa iruuntai aaknum yuragmia numamtin utsaanar au takuni weakaigka israelita ainasha we jakaruiti. Antsu yuragkim

wetsuk nuig asamtaigka nitasha wetsuk nuig matsama jakaruiti. ¹⁸Israelita ainaka Yuus wetaarma tusa tama we jakaruiti, tura werpa tamaka we jakcharuiti. Tura yuragmia numamtincha wetsuk Yuus ememattasa iruuntai aaknum utsaanar ajakuiti. ¹⁹Yuragmia numamtin wetsuk nukap tsawan Yuus ememattasa iruuntai aaknum utsaanar akaigka, israelita ainaka Yuus tura tarma timaun uminak wetsuk nuig puju jakaruiti.

²⁰Antsu wina emematrixta iruuntai aaknum yuragmia numamtin utsaanar au ishichik tsawan asa, takuni weakaigka atumsha wetaarma tusa Yuus timau asar, nitasha we jakaruiti. Tura nu weachaigka atumsha werpa timau asar, nitasha we jakcharuiti. ²¹Yuragmia numamtin chikichik káshia nui wetsuk akaigka we jakcharuiti. Tura tsawai wenakaigka yuragkim israelita ainan yakigtin wejakuuti. Tura tsawai wetsuk au káshi weakaigka nitasha we jakaruiti. ²²Yuragmia numamtin utsaanar Yuus ememattai aaknum jimar tsawan, chikichik nantu tumachkusha chikichik uwí wetsuk nuig akaigka nitasha wetsuk nuig matsama jakaruiti. Antsu yuragmia numamtin utsaanar

Yuus ememattai aaknum au takuni weakaigka nitasha we jakaruiti. ²³Yuus Moisésan tina turusag uminak yuragmia numamtin Yuus ememattai aaknum utsaanar au weachkaigka nitasha we jakcharuiti. Antsu yuragmia numamtin Yuus ememattai aaknum au takuni weakaigka nitasha we jakaruiti.

**Israelita aina Sinai
nugkanmaya jintramu**

10 ³³Tumawar mura Sinaiá tutainmaya jiinkiar, arca emak weakai nuna iisar we wena-kua nita matsamsatnunam tres tsawan jeawaruiti. ³⁴Tsawai wena-kaigka nitan mamikas yuragkim takuni wejakuiti. ³⁵Tuma asam-tai arca wetatuk jakaigka Moisés chichaak: “Wina apuru, jamina kajertamin aina, amina waitmakar ashamramainak tsekeararti!” tusa tujakuiti. ³⁶Turasha arca wetsuk nuig akaigka Moisés Yuusan chicharuk: “¡Wina Yuusru, yamaika waketkim Israel shuar shir nukap aina nujai pujusta!” tusa tujakuiti.

**Shuar aina pegkerchau
chichainakai Yuus kajerkamau**

11 ¹Israelita aina waitu pujuina asar pegkerchau chichaina. Tumaina asarmatai Yuus nuna nekaa kajerak nita pujuinamunam jin akuptuk ekemak ujumak shuaran ijinawaiti. ²Yuus turakai israelita aina Moisésan Yuusjai chichasti, tusa ujkaruiti. Turam Moisés ji kea nu nagkankati, tusa Yuusan aujsauwaiti. Turamtai ji keamun nagkankauwaiti. ³Tuma asamtai nu nugkan Tabera anaika-ruiti, Tabera ta nunaka Yuus jina

akuptuk ekemakmau taku tawai. ⁴Israelita ainajai chikich shuar ainasha nitajai iruuntrar yujaina asar senchi tsukamainak, yutain pachisar chichamruina. Tumaina asarmatai israelita ainasha chichainak: “¡Yáki ii yuatnuncha amastaj!” tusa tuina. ⁵⁻⁶Yuus manán akupkamun aya nunak yuina asar, yawettrar chichainak: Namagken ina surammainka atsawai, Egipto nugkanam pujusrika pepino aina, araka nere aina, namak, cebolla, tura ajos aina nu yuwaji. Turasha yamaika aya manák yuina asar yawettraji. Juigka tsukai waitainaji, Egipto nugkanmagka shir yuar pujuyaji, tusar tia-ruiti. ⁷Manáka cilantro tutai jigkai shikapchichia nunin ajakuiti. Tura iimigka numi puari yagkutakua numamtin ajakuiti. ⁸Maná kug-kuntigka harina aceitejai pachimra torta najanamun kugkuntijai metek ajakuiti. Tumaina asar nitaka káshikmas aa jintrar manán jukar kayajai nekearar panka numam-tinan najanawar inarujkaruiti. ⁹Káshika sana kakeakai manásha nui pachitkau nita pujuinamunam kakea jakuiti.

**Moisés Quebrotnum pujus
pegkerchau chichakmau**

¹⁰“Israelita aina ii wakeramu yuatsji, tusar nita jeen waitiri pujusar útainamun, Yuus nekaa nitan kajerkauwaiti. Tura Moiséscha tumasag nita tuinamun naki-trauwaiti. ¹¹Yuusan aujeak, wii amina inatairam aisha ju shuar aina jukim umata tusam wina inai-tursamsha urukamtai waitkaram. ¹²Wika nita aparinchuitjai, tura nita nukurinchuitjai, tumau asan nita

yaruaknaka ame nita uuntri aina nugka anajmatawaitam nuigka ejé-maitsujai. ¹³Ju shuar aina namag sukartusta, tusar útainawai. Turasha namag atsau asamtai wika nitanka namagnaka sumaitsujai. ¹⁴Wika ju shuar aina junaka, wikika yaruakan wemaitsujai, ¡nu turataj tamauka winigka shir iturchataiti! ¹⁵Wii tajam nu umirtumainchau akumka waitu pujui tusam jakati turutta. Nu turutawakminka waittanka inaisat-tajai”, tusa Moisés Yuusan tinaiti.

¹⁶Takai Yuus Moisésan chicharuk: “Wina emematrutai aaknum israelita apuri araantusa iitai ame nekamu aina setenta itawarta, turam nitajai nakarsata. ¹⁷Tumawakmin wii nui taan amijai chichastajai, tura Wakan Pegker amina yainmauwa nuna nitancha susartajai. Turamu asar ame takamaina nuna nitasha yainmakarti. Turutmainakaigka imanikmeka waittsashtatme”, tusa Yuus tinaiti.

¹⁸Nuiyasha Yuus Moisésan chicharuk:

“Israelita aina kashin namagken yuawartin asamtai, pegkermakartarma tusam tiarta. ¡Yáki namagasha amastaj! ¡Egipto nugkanmagka shir pujuyaji! Tusar nita útmaun antukmajai, tuma asan namagken yuawarti tusan susartatjai, turam yuawartatui. ¹⁹Nuka chikichik tsawan tumachkusha jimarchik tsawanchau, tumachkusha cinco tsawan tumachkusha diez tsawanchikchau tura veinte tsawankechu. ²⁰Wii nitajai pujamun nekainayat wina nakitruinak chichainak: ¡Egipto nugkanmayagka jinmainchau jintrauwaitji! Tusar tiaru asarmatai kashin nagkamas namagken yui

yuinakua chikichik nantun ejéniartatui, tumawar yawettrar nakitiartatui, tura nuiyasha nujinmasha itakartatui”, tusa Yuus Moisésan tinaiti.

²¹Takai Moisés Yuusan ayak:

“Israelita ainaka nuwaka nekapmatsuk aya aishmag uun aina nuke seiscientos mil shuar ainawai, ima nukap aina nusha namagsha tuiya suakmea chikichik nantusha ejétam. ²²Vaca aina, tura oveja aina ashi kajegkar ayurkursha ejémaitsui. Tura nayantsanmaya namak aina jukar ayurkursha ejémaitsui, tusa Moisés Yuusan tinaiti. ²³Tama Yuus, Moisésan chicharuk: Wii tujinmainka atsawai, tuma asamtai wii tajam nu metek uminkattawai”, tusa tinaiti.

²⁴Tusa timatai Moisés we israelita ainan Yuus timaun ujakuiti. Tura nita apuri ainan setenta irumar Yuus ememattasa iruuntai aaknum Yuusan nakasuiti. ²⁵Nui pujuinai Yuus yuragminam pachitkau tarauwaiti, tuma Moisésjai chichasuiti. Nuna tura Wakan Pegker Moisésan yayájakua nuna nitancha susauwaiti. Nu turamu asar nitasha Yuusa chichamen etserkaruiti. Turasha nuka atak awenagka tumachuiti. ²⁶Setenta apu ajakaru nuiya etegkamu ainayat Yuus ememattasa iruuntai aaknumka wetsuk nita pujutairinig juakaru ainawai. Tumawaru ainakaisha Wakan Pegker nitancha pujursaru ainawai, turamu asar nitasha Yuusa chichamen nita pujuinamunam etseraina. Nuka Eldad tura Medad nu ajakaruaiti.

²⁷Tumainakai chikichik uchi tsekegki we Moisésan chicharuk: “Eldad tura Medadjai Yuusa chichamen etserainawai”, tusa ujakuiti.

²⁸Nun ajakua nuna uchiri Josué uchichik nagkamas Moisésan yayá-jakua nu pujau asa, Moisésan chicharuk:

“¡Wina apuru, Moisésa jimar shuar Yuusa chichamen etseraina nu itat-mantikata”, tusa tinaiti!

²⁹Turasha Moisés chichaak: Winak kajertakum tame. ¡Wika Yuusnau ainaka Wakan Pegker yayasaram ashi shuar aina Yuusa chichamen etserkarti, tusan wakerajai! tusa tinaiti.

³⁰Nuna tusa inaiyak Moisés tura Israel shuar ainan apuri ainajai nita pujutainam wakettraru ainawai.

Codorníz ainan Yuus israelita aina pujuinamunam ishiakmau

³¹Nuna tinu asa kashin tsawak Yuus nasen akupkauwaiti, turam senchi nasentuk codorníz tutain waya numamtin ainan nayantsan-mayan shir nukap ikaankauwaiti. Nita pujuinamunam nagkama chikichik tsawan jeamainnum enetkauwaiti, nuiyasha patamtuniar chikichik metro tumain nupar asauwaiti.

³²Tumamtai israelita aina chikichik tsawan, chikichik káshi tura kashin tsawaksha turusag jukaruaiti. Turawaru asar dos mil kilo tumainan jukaru asar ashi tinamnaikaru ainawai. ³³Tura codornízan apawar eke nawainatsaig Yuus nitan kajerkauwaiti. Tura asa jatan akuptuk israelita ainan nukap ijinawaiti. ³⁴Tuma asamtai nu nugkanca Quibrot-hataava anaikaruaiti. Nunaka shuar aina aya yutanak enentaimtin aina nu jinamu taku tawai. ³⁵Israelita aina nu nugkanam pujuina jintrar we wenakua Haserotnum jeawar, nu pujusaru ainawai.

María Aarónjai Moisésan kajerkamu

12 ¹Etíopenmaya nuwan nuat-kau asamtai, María Aarónjai Moisésan kajeraina. ²Tumaina asar, amijaigkik Yuus chichaa ijaisha chichauwayi, tusar Moisésan tiaruaiti. Tusar tuinamun Yuus antukuiti. ³Tusa tuinamun antuksha Moiséska shuar ashi nugkanam pujujakaru nuiya ni ima kakakchau ajaku asa, kajeaksha pachikchauwaiti. ⁴Turasha Yuus nuna nekau asa Moisésan chicharuk: “Ame, Aarón, tura María-jaimak, wina emematrittsa iruuntai aaknum wetaarma”, tusa tinaiti. Tusa takai Yuus ememattasa iruuntai akan waitirin wearuiti. ⁵Tumawarmatai nui Aarónkan, tura Maríajai untsuk ⁶Yuus chicharuk: “¿Wina chichamrun umincha urukamtai pegkerchausha chicharearme? Wina chichamrun shuar ainan ujaktasan wakeraknaka wina chichamrun etsernun karanam ujauwaitjai, turam ni nuna juki shuar ainan ujauwaiti. ⁷Turasha wina inat-tair Moisésnaka tuka chichachuitjai. Nigka wina inatair chikich aina nuna nagkasau wina chichamrunka metek umirtinaiti.

⁸Wika Moisésnaka paan wantintukan chichaajai. ¿Wina chichamrun umincha urukamtai pegkerchausha chicharearme?” tusa tinaiti.

Moisés Canaán nugka nekaatarma tusa doce shuaran akupkamu

13 ¹Tuma nui Yuus Moisésan chicharuk: ²“Canaán nugkan nekaawarti, tusam doce tribunmaya apu aina shuar pegker enentaimkau etegkram akupkarta”, tusa tinaiti.

²⁵Tumawar cuarenta tsawan yujasar nugkan nekaawar, ²⁶Cadés-barnea tutainam waketki tawaruiti. Tuma nui aya nugkanmag Paránum Moisés, Aarónjai pujamunam jeawar ashi israelita aina antuinamunam nita wainkamuri ainan etseraruiti. Turuinak araka nere itamuri ainancha inakmasaruiti. ²⁷Tuma Moisésan chicharainak: Ame nugka nekata tusam akupkartukmam nuigka, nu nugkaka pegkerayi, árak ainasha iruunmayi. Ju árak ainaka, nu nugkanmaya itaji. ²⁸Antsu nuiya shuar ainaka kakaram, nita yaaktari ainasha uun shir pegmarmau armayi tura nayau armayi. ²⁹Négueb nugkanmagka amalecita aina, hitita aina, jebuseo aina, tura amorreo aina matsatainawai. Antsu nayants yantamka, Jordánnum nugka paka amaunam, cananeo aina matsamiarmayi, tusa tuina. ³⁰Tuinakai Caleb, Moisésan emtin israelita ainan chicharuk: Ii shiakar nu nugkaka akinkarmi, ii ima kakaram ainaji, tusa tinaiti. ³¹Takai nijai wearu aina nuiyag chichainak, atsa nu shuar aina nujaigka maanimain ainatsji, nita ima kakaram asarmatai maaniakrishana nepetmain ainatsji, tusar tiaruiti. ³²Tusar nugka nekattsa wearu aina nuiyag ujumak shuar chichainak: “Nuiya shuar ainaka tuke maanisarke iruunin ainawai. Tura nuiyasha kakaram ainawai. ³³Nuiyasha nitaka shuar nayau asarmatai, ika nitajai apatakamka yunchia numamtin shikapchich ainaji”, tusar tiaruiti.

**Israelita aina Yuusa
chichamen umikcharu aina**

14 ¹Tuinakai antukar sapijmainak nu kashitin uu útainakua tsawararu ainawai. ²Tumaina asar Moisésan Aarónjai

pegkerchaun chicharainak, Egiptonmag jinumaina nu, tura aya nugkanmag jinta wesar jinamusha pegkeraiti. ³Yuus jui inka maaniamunam jinawarti, tura nita nuwe ainan, uchiri ainancha achirar yarutkarti tusa imajaigka ikatmakji. Nekaska Egiptonam aya waketmainaitji, tusa tuina.

⁴Tusar nitak chichainak: Egipto nugkanam ina juramki ejétammam chikichik shuar apu anakami, tusa tuina. ⁵Nuna tusa tuinakai Moisés Aarónjai ashi israelita aina emtin nugkan antiastatuk tsuntsumawaru. ⁶Nugka nekatarma tusa akupkamu ajakarua nuiya Josué tura Calebjai kajekar jaanchrin jakaru ainawai. ⁷Tumawar ashi israelita ainan nita chicharainak: ¡Ii ainati nugka nekat-tsa werimaj nuka shir pegkerayi! ⁸Yuus ijai pujau asa, ni yainmasmatai nugka pegker asamtai árak aina pegker tsapauwa nui wayattaji. ⁹Yuuska pegkerchau chicharkairpa, nuiyasha nitan yaimainka pegke atsawai, antsu inka Yuus yainmakattaji. Tuma asamtai nu nugkanmaya shuar ainaka ashamkairpa, tusar tiaruiti.

¹⁰Tusa tuinamsha Josué nita Calebnasha kayajai tukurartasa chichaina. Tuinakai Yuus, ni ememat-tasa iruuntai aaknum taa israelita aina emtin tsaaaptin jasuiti. ¹¹Tuma Moisésan Yuus chicharuk: Ju shuar aina juka wina pachitas pegkerchaun chichaskeka pujumainchau nekapanawai. Nuiyasha wainchatai aina iwaintamsha tuke utujimainawai. ¹²Wii nitanka jinati tusan jatan akuptukan ijinattajai, turamu asar nitan nugkan anajmatawaitaj nuigka jeachartatui. Antsu aminka nukap

napamkattajme, tusa Yuus Moisésan tinaiti.

¹³Takai Yuusan Moisés aujeak: Yuusru, ame etegkamuram aina ijinawakminka, egiptonmaya aina nuna antukar, ¹⁴ame israelita ainajai pujamun, nita paan wantintukam tsawaika yuragmia numamtinum wejakuitam nuna, tura káshika ji keawa numamtinum wejakuitam nunasha Canaánumia shuar ainan ujakartatui. ¹⁵Ame etegkamuram aina nu ju tamauwaik ashi ijinawakminka, ame turamuram aina nuna antukaru ainaka, ¹⁶amina pachitmasar pegkerchau chichartamainak: Yuuska ni etegkamuri ainanka nugkan anajmatawa nui eje apuj-sataj tukama tujintak ijinayi, tusar turamiartatui.

¹⁷Turammain asarmatai, apuru, ame ashi turinaitam nu yamai iwainmamkata. Ame chichakum tinaitme: ¹⁸Wika wári kajechuitjai, wina anegrattairka tuke atinaiti, tura shuar tunaun takasu akusha tsagkurturta, tusa turutkaigka wika tuke tsagkurnaitjai. Turasha shuar tunaun takasaru ainan, tura nita uchiri ainan, tiragke ainan, tiragke uchiri ainan tura nuna tiragke ainancha waittan suwaitjai, tusam tinaitme. ¹⁹Ju shuar aina juka Egiptonmaya nagkamsam kuitamkam imajai itawarume, tura asan nekas ame nita aneakmekka, amina shir senchi anegrattairmijai, nita tunau takasmauri ainasha tsagkurarta, tusa Moisés Yuusan tinaiti.

²⁰Tama Yuus Moisésan chicharuk: Takuminka ijintsuk tsagkurartatjai. ²¹Wika Yuusaitjai, tumau asamtai wii pegker aina takamurnaka ashi nugkanam nekainawai. ²²Egipto

nugkanam tura aya nugkanmasha wina tsaptinrun, tura wainchatai ainan wii iwainamun nukapea wainkaru ainaksha, winaka nukapea nekaprusaru, wina chichamrun umirtukcharu ainaka, ²³tura wina pegkerchau chichartukaru ainasha, nita uuntri ainan nugkan anajmatawaruitaj nunaka wainkchartin ainawai. ²⁴Antsu Caleb chikich aina wina chichamrun umirtuinachkaisha nigka metek umirtuku asa, nugkan wii anajmatawaitaj nunaka wainkattawai. ²⁵(Amalecita aina tura cananeo ainasha nugka pakanam pujuinawai.) Antsu atumka kashin káshikmasrum atum tamaunmani aya nugkanmag nayants Kapantunmani wetatrume. ²⁶Yuus Moisésan Aarónjai chicharuk:

²⁷“Israelita aina pegkerchau asar inaitsuk wina pachittsar pegkerchau chicha yujaina nuna antukjai. ²⁸Tumaina asarmatai ame weme wii titatjam nu ujakum: Wii, Yuus asan tajai, nita chichainamun anturkamaj nunisarag nitanka umintuktatui. ²⁹Ashi shuar uun aina veinte uwí aramu tura nuna inagkas aramu nita naari papiinum aatmamtikramu aina wina pachittsar pegkerchau chichartukaru ainaka jinawar nita iyashi ainaka aya nugka juig utsankattawai. ³⁰Antsu Caleb tura Josué nugkan amatasan wii anajmatawaitjarne nui wayawartatui. Turasha chikich ainaka pegkesha wayachartatui.

³¹Atum chichakrum ina shuari aina ina mantamainak ina uchiri ainan yaruakartatui timarum nuka turchartatui. Wii atumi uchiri ainanka atum nugka nakitrau ainarum nui

yaruakan apujusartatjai, turawaram arakan arakmawar yuinak shir aneasar pujusartin ainawai. ³²Antsu atumka aya nugka juig jinattarme. ³³Atum wina nekasapita tusarum turutchau asaakrumin atumi uchiri aina oveja ainan kuitamin jasar aya nugkanmag cuarenta uwí yujasartatui. Nunaka atumin aya nugkanmag ashi jinati tusar nakarmainak tumawartatui. ³⁴Nugka nekattsarum cuarenta tsawan yujasuitrume, tuma asarum atum chicham umikchamunam nu waitat juakrum cuarenta uwí pujuttarme. Chiki chikichik uwítin chikichik tsawan waitat jutattrume. ³⁵Wii, Yuus asan taja nunaka ashi metek umiktatjai. Wina pachittsar pegkerchau chichartukaru aina nuka ju aya nugka juig jinawartatui”, tusa Yuus tinaiti.

³⁶Nugka nekata tusa Moisés akupkamu aina waketrar jeawar nugkaka pegkerchauwayi tusar etserkaru ainawai. Nu tusa etsermaun antukar pegkerchau chichakaru ainawai. ³⁷Nu shuar tu chichakaru aina nuka Yuus waitat susam jinawaru ainawai. ³⁸Nugka nekatarma tusa doce shuar akupkamua nuiya Josué Calebjai jakacharu ainawai.

Hormá nugkanam israelita ainan ijinamu

³⁹Moisés israelita ainan Yuus timaun pachis ujakuiti. Turawaram ashi wake mesekaruiti. ⁴⁰Tura kashin tsawaarar káshikmas nantarar wear nainnum wakaruiti. Tumawar chichainak:

“Ika nekas tunau takasuitji, tuma akursha Yuus ina nugkan

anajmatramawaitaj ai wearmi, tusa tiaru ainawai.

⁴¹Turasha Moisés nitan chicharuk: Atumka Yuusa chichamegka umir-tsurme. Tuma asarum atum wakerarum nuka metek uminkashtatui. ⁴²Yuus atumjai pujachu asamtai werpa. Nui weakrumnaka chikich shuar aina atumjai maaninak ijitmattarme. ⁴³Atum chichame umir-kachmau asa Yuuska atumjaigka pujatsui. Tuma asamtai atum ai weakrumnaka amalecita aina, tura cananeo aina ijitmattarme”, tusa Moisés tinaiti.

⁴⁴Tamaitiat nainnum wakaruiti. Turasha Moiséska nita matsamamunmag juakuiti, tura Yuus chicham umikmau egkeamu arca ajakua nunasha jukicharuiti. ⁴⁵Tumawaru asarmatai amalecita aina, cananeo aina, israelita ainan patatukar maa mainakua Hormánam ejénaruiti.

Entsa muchignumia jiinkimu

20 ¹Aya nugkanmag yuja yujakua cuarenta uwí ejénar, Zin nugkanam jeawaruiti. Tumawar Cadésnum matsamsaruiti. Tura matsatmaunam María jakamtai ikusaruiti ²Entsa umumain atsau asamtai shuar aina kajekar Moisésan, Aarónjai ³chicharainak: Ii shuar ainan Yuus ijinamia nuig jina akurka imajnikrika waitu yujamaitsuji. ⁴⁻⁵ ¿Urukamtai kitaikai jinati tusarmesha uchirtuk, tura tagkurtuksha Egiptonmayasha jiikratkimarme? Juigka nugkasha árak araa juumainkisha, tura umumainkisha pegke atsawai, tusa

^a 14.44 He 3.12-19

tiaruiti. ⁶Tuinakai Moisés Aarónjai, Yuus ememattasa iruuntai aaknum jeawar Yuusan aujaina. Tumainai Yuusan senchiri tsauptin wantintukaruiti. ⁷Tura Yuus Moisésan chicharuk:

⁸Shuar ainan Aarón irumrati. Turamtai ushukrutai jukim muchig a nui jeam, entsa jinta tusam titá. Tama entsa jijnmatai shuar aina, tura tagku ainasha ashi umararti, tusa tinaiti. ⁹Tutai Moisés Yuus tina turusag umiak ushukrutain juki, ¹⁰Moisés, Aarónjai shuar ainan irumar muchig amaunam chicharuk: Chichaman umichu ainata antuktarma: Atum umartin entsa muchignumia jii maintika ii ainatsji, tusa tinaiti.

¹¹Nuna tusa ushukrutajai muchigin jimaraa awatnaiti. Turamtai entsa

muchignumia nukap jinnaiti. Tumamtaishuar aina, tura tagku ainasha ashi umararuiti. ¹²Turasha Yuus Moisésan Aarónjai chicharuk: Atumka wina nekasapita tusa turutchau asarum, israelita emtincha winaka umirtukchau asarum, wii nitan nugkan anajmatawaitaj nuigka, ju shuar ainajaigka atumka jeashtatrume. Antsu nita wii nugkan susartataj nuigka jeawartinaiti, tusa tinaiti. ¹³Nu entsaka Meribá tutai ajakuiti, Meribá ta nunaka chichamrukmau taku tawai, israelita aina Yuusan umirtsuk pegkerchau chicharujakaruiti. Tu chichakaru ainakasha Yuus nina pegkerin iwaintukuiti.

Edomnumia aina Israel shuar ainan inagkatan nakitramu

¹⁴Moisés Cadésnum pujus, chichaman etserin ainan akupeak,



(Nm 20.11)

Edomnumia apu chicharkurum: Amina yatsum israelita aina wait-tanam matsataina nuka nekainame. ¹⁵Ina uuntri ajakarua nu Egiptonam shiakar nukap tsawan matsamajakaruuti. Nui matsatun egiptonmaya aina waitkajakarua numamtuk incha waitkarmainaji. ¹⁶Yuus ii seammaun anturtamak chikichik nayaimpinmaya shuaran akupturmakmatai nu yainmasmatai Egiptonam matsatuti jijntrarji. Tumar yamaika yaakat Cadésnum amina nugkem tesamua nui matsatji. ¹⁷Wait aneamam nagkamaktarma tusam tukartita, amina nugkemini nagkamaktatji. Tumakrishá árak arakmaunumka nagkamatsuk, tura yumirmataisha umutsuk jintanmag wea weakuar amina nugkem nagkaikittsar taji tusar tuina.

¹⁸Turasha Edomnumia apu ayak: Wina nugkaruigka nagkamakirpa. Tamaitiatrum umiachkurminka wina suntaarujai maaniattaji, tusa tinaiti. ¹⁹Tusa takaisha akupkarmau aina apun ayainak: Jinta weamunmag nagkamaktasa taji. Antsu ii ainati, tura ina tagkurigsha kitainak entsan yumirmatainmayan umuinakaigka, urutam akikkit turusrik akikmaktatji, tusar tiaruiti. ²⁰Turasha Edonnumia apu ayak: Takurmesha nagkamakchattarme tusa nina suntaari ainajai shir umintsar israelita ainan jinturuuti. ²¹Tura nagkamamainchau amajsamu asa, israelita ainaka chikich jintanam weartasa ekaruiti.

Aarón jakamu

²²Tumawar Cadésnum matsatu jiiinkiar we wenakua Hor nugkanam jeawaruuti. ²³Tuma nui matsatun

Moisésan, Aarónjai Yuus chicharuk: ²⁴“Entsa Meribánam wina nekasapita tusa umirtukchau aina asaakrumin, israelita ainan nugkan susatjarme tusan anajmatawaitaj nuigka, Aarónka jeatsuk jakattawai. ²⁵Tumatin asamtai, Aarón nina uchiri Eleazarjai jukim Hora naintrin iwakta. ²⁶Turam Aarón sacerdote asa nugkuara nu awiikam nina uchiri Eleazar anugkrata”, tusa tinaiti.

²⁷Yuus timaun turusag Moisés umiak, shuar ashi wainainamunam Aarónkan nina uchirijai juki, Hora naintrin iwakuuti. ²⁸Tura nui Moisés Aarónkan sacerdote asa jaanch nugkuarmaurin jurus Eleazaran anugkrauwaiti. Turamtai Aarón jakauwaiti. Tumamtai nuig ikusar Moisés Eleazarjai nainnumia waketkiaruuti. ²⁹Tuma israelita ainan ujanak, Aarónka jakayi tusa tiaruuti. Nuna antukar chikichik nantu útuk matsamsaruuti.

Israelita aina Aradnumia shuar ainan nepetkamu

21 ¹Néguebnumia shuar cananeo ainan apuri jas yaakat Aradnum pujau, israelita aina Atarim jintanmani wininawai, tusa tamaun antukuuti. Tuma nitajai maaniattsa nina suntaari ainajai werinaiti, tuma maaninak nitan nepetainak ni achiamunka achir yaruakuuti.

²Turamu asar israelita aina Yuusjai chichainak, nepetmakarti tusam ame ina yainkratkuminka, nita nepetkur yaaktari ainasha ashi tsairattaji, tusa tiaruuti.

³Tusa tuinakai Yuus israelita ainan nepetmakarti tusa yaigkuuti.

Turamu asa Canaánumia ainan nepetainak yaaktari ainancha tsairaruiti. Nuna turawaru asar nu nugkanka Hormá anaikaru ainawai.

Moisés napin jirujai najana numinam nena awajsamu

⁴Hor nugkanam pujuina jiinkiar, Edomnumanigka wetsuk tenkiar Nayants Kapantu tutainmani wearu ainawai. Tura nui yujasar wii shuar aina ⁵kajekar Yuusan pachisar, tura winasha pegkerchau chichartuinak: ¿Urukamtai aya nugkanmag yujas, tsukai jinati tusamsha Egiptonam matsatrincha jiikratkimame? Juigka yumainkisha, tura umumainkisha pegke atsawai. Antsu Yuus, yutain nayaimpinmayan akupeamu nuke yuina asar yawettraji, tusar Moisésan tiaru ainawai. ⁶Tuina asarmatai Yuus napin ishitkauwaiti. Turam shuar ainan nápi asai ijinu. ⁷Turuinam Moisésan chicharainak: “Ika Yuus pachisar, tura amepachisrisha pegkerchau chichaku asar tunau jasarji. Tuma asaakrin ina tunaui pachisam Yuus aujsata. Turawakmin nápi ainan emegkarti, tusa Moisésan tiaruiti.^b Tusa tui nakai Moisés Yuusan aujsauwaiti. ⁸Turam Yuus Moisésan chicharuk: Nápi najanam numinam anujkam awajsata. Turawakmin shuar aina, nápi asaim jainaksha nuna iisar pegker jasarti”, tusa tinaiti.

⁹Yuus timaun Moisés turusag umiak nápin najana numinam anujkam awajsauwaiti. Turamun shuar aina nápi asaim jainasha nuna iisar pegker jasaruiti.^c

Balac nina inatairi ainan Balaam utitarma tusa ishiakmau

22 ¹Israelita aina jiinkiar we wenakua nugka Moab tutainam Jordán entsanam jeawaruiti. Turasha Jordán amain Jericóka ajakuiti. ²Ziporan uchiri, Balac israelita aina amorreo ainan ijinujakun nekajakuiti. ³Nuiyasha israelita ainakai shir nukap ajakaruiti. Tuma asamtai, Moabnumia shuar aina nuna wainkar shir senchi ashankaruiti. ⁴Tumaina asar Moabnumia shuar aina Madiánumia apu ainan chicharainak: Vaca aina chirichirin yuak amuwa numamtuk, yamai incha israelita aina ijittattaji, tusa tuina. Nu tsawantinka Moabnumia apu Balac naartin pujujakuiti. ⁵Beora uchiri Balaam yaakat Petor tutainam entsa uun Éufrates tutainam jeastatuk pujujakuiti. Tuman Balac israelita ainan maniak nepetmainchau asa Balaam untsuka utitarma tusa chichaman etserin ainan akupuk: Israelita aina Egiptonam matsatu jiiintrar ina nugkeen kaunkar matsataina juna, ⁶wári taa nitan pegkerchau chicharkati, nitaka ina nagkatamsau senchirtin ainawai. Ame pegkerchaunam chicharkakminka wii nitan nepetkan ju nugka jui matsatainan jiiran ishiaktattaji, ame pegkernum chicharkamu tura ame pegkerchau chicharkamusha metek uminna nuna nekau asan tajai, tusa tinaiti.

⁷Turamu asar Moabnumia apu aina, tura Madiánumia apu ainasha wenak Balaam pegkerchau

^b 21.7 1Co 10.9 ^c 21.9 Jn 3.14-15

chichakmatai akiktinan kuitan jukiari wearuiti. Tuma jeawar apu Balac timaunka turusag Balaaman ujakaruiti. ⁸Turam Balaam nitan chicharuk: Yuus arum káshi karanam wari turuttig, ni turutmatai kashin ujaktajrume, juig kanartarma, tusa tinaiti. Takai nuig kanararuiti. ⁹Tura Yuus káshi karanam Balaaman chicharuk: “¿Amina jeemin shuar matsataina jusha tuiyampa ainawa?”, tusa tinaiti.

¹⁰Takai Balaam ayak: Moabnumia apu Ziporan uchiri Balac naartina nu wina chichaman akupturuk, ¹¹israelita aina Egiptonam matsataina juna Balaam wári taa pegkerchaunam chicharkati. Turamtai wii nitan ina nugkenian jiran ishiakartajai turutui, tusa tinaiti. ¹²Takai Yuus chicharuk: Israelita ainaka wii etegkamun ainawai. Tuma asamtai, pegkerchau chicharkattsamka nitajaigka weepa, tusa tinaiti. ¹³Tutai Balaam kashin tsawak, Balac akupkamu ainan chicharuk: “Yuus winaka nitajaigka weepa, tusa turutui. Tuma asamtai atumin nugkeen waketkitarma”, tusa tinaiti.

¹⁴Tutai waketkiar Balackan jeari ujainak: Balaamka Yuus weepa turutu asamtai, winishtatjai timayi tusar tiaruiti. ¹⁵Turasha Balac chichaman etserin ainan yama nagkamchak akupkamun nagkas yacha ainan ataksha akupkauwaiti. ¹⁶Turawaram Balaaman jeariar ujainak: Apu Balac chichartamuk: Wait aneas Balaam nakimtsuk taati. ¹⁷Tuma israelita ainan pegkerchau chicharkati. Tura ni warinak

wakerit nunaka turusnak susattajai turammayi, tusar Balaaman ujakaruiti. ¹⁸Tutai Balaam chichaak: Oron, tura kuitan surakaisha Yuus turata turutchakaigka turumaitsujai. ^d ¹⁹Tusa nitan chicharuk: Yuus arum káshi wari turuttig ni turutmatai kashin ujaktajrume juig atumsha juakrum kanartarma, tusa tinaiti.

²⁰Yuus Balaaman káshi karanam chicharuk: “Ju shuar ainajai yamaika wetá, turasha wii titatjam nuke umikta”, tusa tinaiti.

Nayaimpinmaya shuar Balaaman wantintukmau

²¹Timau asa tsawaar Balaam nina burrorin ekeemas chichaman etserin ainajaimak wuwaiti. ²²Turasha Balaamka, (apu Balac anajmatamu asa, nuna wakerus) nina inatairin jimaran juki wea. Tuma asamtai, Yuus kajerak wechati tusa nayaimpinmaya shuaran ni weamunmani jintanam awajtusuiti. ²³Turamu asa nayaimpinmaya shuar kuchiin takus jintanam wajaun burro wainak ashamak jintachunmani weakai, Balaam burrorin awattrauwaiti. ²⁴Tuma jintanam amamak weakai nayaimpinmaya shuar, junta tsere-rach mai yantamen kayajai tanishmarmaunam nakakuiti. ²⁵Tuma wajaun burro wainak menaan nagkaikitaj tusa kayajai tanishmarmaunmani tsekeak Balaaman kagkajin chanuntawaiti. Turam Balaam kajek burrorin ataksha awattrauwaiti. ²⁶Tura weakai nayaimpinmaya shuar junta shir tsererchinam pegkesha nagkamamainchaunam

^d 22.18 Jn 15.5-6

ataksha nakakuiti. ²⁷Tuma asam-tai nayaimpinmaya shuaran burro wainak wetsuk tepesuiti. Tumam-tai Balaam kajek burrorin awat-trauwaiti. ²⁸Turamtai Yuus burron chichamtikuk: ¿Urukamtai tresa imajnishawatturume?, tusa Balaaman tinaiti. ²⁹Tama Balaam chicharuk: Umirtachkumin awattrajme, kuchiin takakkunka yamaik maa-mainaitjame, tusa tinaiti. ³⁰Tama burro chichaak: Wika amina burroram asan tuke umirnaítjame. Wii amina chikichikisha jutikachuitjam nuka shir nekame, tusa tinaiti. Tama Balaamsha nekas tame, tusa tinaiti.

³¹Takai Yuus nayaimpinmaya shuaran kuchiin takus junta wajaun Balaaman wainmamtikkauwaiti. Turam wainak tikishmatrauwaiti. ³²Turasha nayaimpinmaya shuar chicharuk: ¿Urukamtai burormesha tresa imajnishawattraume? Pegkerchau enentaimsam wea asaakmin nagkamakim tusan junta nakakujme. ³³Burroram wina waitak menaan nagkatachkaigka aminka maakun burrominka akupmain amajkajai, tusa tinaiti. ³⁴Tutai Balaam nayaimpinmaya shuaran chicharuk: Ame junta wajamun nekachu asan, burrorun awattrajai. Tuma asan wika tunaun takasjai. Ame wetá tusam turutchakminka waketkitjai, tusa tinaiti. ³⁵Turasha nayaimpinmaya shuar chicharuk: Wakettsuk nu shuar ainajai weam antsamek wetá. Tumakmesha wii titatjam nukepachisam Balac ujakta, tusa tinaiti. Tama Balaam wuwaiti.

Balac Balaaman igkugmau

³⁶Balaam winawai tamaun Balac antuk, igkugtajai tusa yaakat

Moabnum wuwaiti. ³⁷Tuma igkug chicharuk: Chichaman nuik akup-tukmajam nuisha ¿urukamtai tatasha nakitramame? ¿Ni warinak wakerit nunaka turusnak susatjai tusan timaj nu antukmesha, aantar tawai tusamek taachmam?, tusa tinaiti. ³⁸Tutai Balaam chichaak: Yamaika amina iistasan taajai. Turasha wiki enentaimsankeka tichattajme, antsu Yuus turata tusa turutata nunak ujaktatjame, tusa tinaiti.

³⁹Tama Balac Balaaman juki, Quiriat-Juzot nugkanam wuwaiti. ⁴⁰Tuma nui jeaa Balac nina inatairi ainan chicharuk: Vaca, tura ovejasha maatarma. Turarum inarkarum Balaam, tura nina uyuunas yujajai yuati tusarum susatarma, tusa tinaiti. ⁴¹Kashin tsawak Balac Balaamjai Bamot-bal tutain mura-riin wakaruiti. Tumawar nui wajasar, israelita ainan matsatun wainkaruiti.

Balaam israelita ainan pegkernum chicharkamu

23 ¹Tura Balaam Balackan chicharuk: Yuus emematur siete vaca aina, tura siete cabra aina maar patasa epeatin, sieteya imajin najanata, tusa tinaiti. ²Tusa tama turusag umikuiti. Turamtai Yuusan eme anentais iyainak tagku ainan maawaruiti. Turawar tagku maa patasa epeatin aina najankamunam tagku ainan chiki chikichik epeawaru ainawai. ³Tura Balaam Balackan chicharuk: Yuus wina wari turuttin nuna nekaan ujak-tajme. Ameka tagku aina maa epe-tai aina juig nakarsata tusa nigka nainnum wuwaiti. ⁴Nui wakamtai Yuus wantintukuiti. Turam Balaam

Yuusan chicharuk: Amina emematkun tagku aina maar patasa epeatin ainan siete najanan nui tagku ainan maan chiki chikichik tagku ainan patasan epeawarmajai, tusa tinaiti. ⁵Tusa tama Yuus Balaaman chicharuk: Balac pujamunam waketikim, wii tajam turusmek ujakta, tusa tinaiti. ⁶Tama Balaam wakетки tagku aina maar patasa epeamunmag, Balackan tura nijai yujainajaimak pujaun jearnaiti. ⁷Tuma Yuus titá tusa timaun turusag chichaak: Aram nugkanam pujai, ame jui taam Israel shuar aina pegkerchau chicharkata tusa Moabnumia apu Balac untsurkamtai tajai. ⁸Yuus pegkerchauka chicharkaipa turutui. Tusa turuta aisha ¿urukamtaig wisha pegkerchausha chicharkat-taja? ⁹Ju nainta jui pujusnak,

au shuar ainaka chikich shuar ainan pujutijai metekchau aina auna wainjai, nitaka chikich shuar ainajaigka iruunar pujuchu ainawai, chikich shuar ainajaigka metekchau ainawai.

¹⁰Nitaka yaikim nekapmamainchauwa imanuiti. ¿Israelita ainancha ya nekapmamainait? ¿Ya israelita ainancha nekapmarsha ejémainaita? ¡Nitaka pegker asar, jainaksha shir aneasar jau aina imani-san wisha jakattsan wakerajai! tusa tinaiti.

¹¹Tama Balac Balaaman chicharuk: “Israelita aina pegkerchau chicharkata tusa itamaitiatmesha ¿urukamtai pegkernumsha chicharainame?” tusa tinaiti.

¹²Tama Balaam Balackan chicharuk:

“Yuus turutmaunak ujaktatjame tusan timajme”, tusa tinaiti.

¹³Turasha Balaam Balacan chicharuk: “Chikich nainnum wemii, tura nuigka israelita aina kanaki pujuina tijuch wainkattame. Turam nu pegkerchau chicharkata”, tusa tinaiti.

¹⁴Nuna tusa Balac Pisgá naintrin Sofim tutainam Balaaman juki wuwaiti. Tuma nui jeaa Yuus emematku tagku aina maar patasa epeatin ainan siete najanawaiti. ¹⁵Tuma nui jeaa Balaam Balackan chicharuk:

Yuus wina wari turuttig nuna nekaan ujaktajme, ameka tagku maar epeaj juig pujusam nakarsata tusa nigka wuwaiti.

¹⁶Tumamtai Yuus Balaaman chicharuk: “Wii tajam turusmek waketikim Balac ujakta”, tusa tinaiti.

¹⁷Tama Balaam wakетки Balac pujamunam jeawaiti. Tumamtai Balac chicharuk:

Yuuscha wari turama tusa inia-suiti. ¹⁸Tama Balaam Yuus timaun turusag chichaak:

Balac, Siporan uchiriya, wii titatjam nu shir anturtukta.

¹⁹Yuuska ii shuarti waitrin ainaj tumauchawaiti. Ni timaurinka nigka metek uminaiti.

²⁰Iman asa israelita aina pegkernum chicharkarta tusa turutu asamtai, nakittsuk nitan pegkernum chicharainajai. ²¹Nita waitrutairin tura nita tunau takatairin nekauka chikichik shuarkesha pegke atsawai. Tura nitajaigka Yuus pujawai. Tuma asamtai nitaka Yuusan juwaiti ina apurigka tusar emematainawai. ²²Vaca aishmagkri nina kachurijai

ayamrumauwa numamtuk,
Yuus ninu ainan nina senchiri-
jai Egipto nugkanam pujuinan
jiiruiti.

²³ Turamu asarmatai Jacob weantu
ainanka

iwishnuka wawemain ainatsui,
Tura Israelan uchiri ainanka
wisha pegkerchauka chichar-
maitsujai.

Israel weantu aina nuna pachis-
san:

“¡Israelita ainan yayák, Yuus
nina senchirijai waincha-
tai ainan nukap iwainaruiti!
tusan tajai.

²⁴ León untsuri asa, kuntinan
patatukar maina numamtuk,
israelita ainasha,
nita shuari ainajai maaninakka
inagnatsuk maa maaniakua
ashi ijina inain artinaiti”, tusa
tinaiti.

²⁵ Tama Balac Balaaman chicha-
ruk: “Pegkerchau chicharmainchau
akumka pegkernumsha chichar-
kaipa”, tusa tinaiti.

²⁶ Tama Balaam chichaak: Wii
amina chicharku wiki enentaim-
sankeka tichattajme tusan timajme,
tusa tinaiti. ²⁷ Tama Balac Balaaman
chicharuk: Ataksha chikich nain-
num wemii, nu nainnum pegker-
chaun Israel shuar ainan chichar-
kati, tusa Yuus turamchaintash
tinaiti. ²⁸ Nuna tusa Balac Balaaman
juki Peor tutai nainntrin iwakuíti.
Nu nainnum waka iiyamka aya
nugkak irunuka ashi wainnau. ²⁹ Nu
nainnum Balac Balaaman chicha-
ruk:

“Yuus emematkur tagku aina
maa epeatin aina siete najanata,
nu turam siete vaca aishmag tsakat

aina tura siete cabra aishmag aina
maata”, tusa tinaiti. ³⁰ Tusa timau
asa, Balaam metek umikuiti. Turam-
tai nui Balac chiki chikichik tagku
ainan epeawaiti.

24 ¹ Turasha Balaam Israel
shuar ainan Yuus pegker-
num yayámun nekau asa, nuiyagka
Yuus wari turuttig nuna nekatjai
tusagka tichauwaiti. Nunaka tuma-
tsuk aya nugkanmani iima wajau.
² Tuma wajas Balaam Israel shuar
ainan wainkau, tuma iima wajaun
Wakan Pegker pujursau. ³ Turam
Balaam atak atinan pachis chi-
chaak:

“Wika Beoran uchiri Balaamait-
jai,

wika Yuus wakera nunaka shir
nekajai.

¡Wii chichaman etserkai antuk-
tarma! ⁴ Wika Yuusa Wakani
wini pujau asamtai,

Yuus ashi senchirtina nu, wina
ni wakeramurin iwainturuk
tura chicham etserkatnun sura
nuna shir nekajai.

⁵ ¡Jacobo, uchiri ainan aakri
ainaka shir pegker ainawai!
¡Israelan, aakrigka shir pegke-
rait!

⁶ Kampanak aina uun tepawa
numamtinaiti,
entsa yantamen árak aina arak-
mau irunna numamtinaiti.

Yagkur Yuus arakmau aina
irunna numamtinaiti,
jentsa yantamen cedro aina
irunna numamtinaiti!

⁷ Israel weantu ainanmagka
entsasha nukap atinaiti.
Nita umartin tura árak aina
ukatkatnusha imanisag ati-
naiti.

Nita apurigka Agagnumia apun nepetkatnaiti.

Tura nitaka senchirtinak artinaiti.

⁸ Yuus Israel shuar ainan Egipto nugkanam pujuinan jiiirua nuka,

vaca aishmagkri nina kachurijai ayamrumauwa numamtuk, nita ainanka pegkernum yayáwai.

Turamu asa nita shuari ainanka nepetiartatui.

Nita shuari ainanka nagkijai iju mainak ukunchin kupiriartinaiti.

⁹ Israelita aina ayamainak tepenakka león ayamak tepena numamtuk tepeartinaiti.

Nitanka pegkesha ishintamain ainatsui.

Amina pegkernum chichartamainaka nitasha pegkernum chicharam artatui.

Amina pegkerchaunam chichartamainaka nitasha pegkerchaunam chicharam artatui”, tusa Balaam tinaiti.

Yuus israelita ainan pachisa timaun Balaam etserkamu

¹⁰ Nuna takai Balac antuk senchi kajek, uwejen awatas Balaaman chicharuk:

“¡Aminka wika nita aina pegkerchau chicharkata tusan utsukan itaamjame! ¡Turamaitiatam tresa imajnia pegkernum chicharkaume!

¹¹ Tuma asam ¡yamaika jeemin waketkita! Wika aminka shir nukap akiktajme tusan timajme. Turasha Yuus nuna nakitawai tusam nita aina pegkerchaunam chicharkachume, tusa tinaiti. ¹² Tama Balaam Balackan chicharuk: Wika amina

inatairam chichaman etserin ainan chicharkun: ¹³ Atumin apuri nina pujusa inamtairin oron, tura plata tutain piakun surakaisha wiki enen-taimesaneka tichattajai, antsu Yuus wakeramunak titatjai tusan timajai.

¹⁴ Ayu, wika nugkaruin waketkittajai. Turasha eke wetsuk ju shuar aina amee shuar ainan turawartata nuna pachisan ujaktajme”, tusa tinaiti.

¹⁵ Tusa Balaam atak atinan pachis chichaak:

Wika Beoran uchiri Balaamaitjai, wika Yuus wakera nunaka shir nekajai.

¡Wii chichaman etserkai antuktarma! ¹⁶ Wika Yuusa Wakaní pujurtau asamtai,

Yuus ashi senchirtina nu, tura Yuus ashi nagkakartakua nu ni wakeramurin winaka iwainturuk,

chicham etserkatnun sura nunaka shir nekajai. ¹⁷ Yuus wina iwainturka nuka eke nagkamatsui, nuka atak nagkamaktinaiti.

Jacob weantu ainanmaya chikichik apu jastinaiti.

Nu apuka ya etsanna numamtinatinaiti.

Tuma nita shuarincha nepettinaiti. Turak Moabnumia ainan apurincha maatnaiti,

tura Set weantu ainancha ashi maatnaiti.

¹⁸ Israel shuar ainaka Edomnumia shuar ainancha nepetkatnaiti, Seír nugkanam nita shuari aina pujuina nunasha nepetkar, nugkan nita jukiartinaiti.

Tura nita shuari ainanka ashi nepetkatnaiti.

¹⁹ Jacobnumia nina shuarin nepetin chikichik shuar atinaiti.

- ²⁰ Nuna tusa inaiyak Amalec shuar ainan yaaktarini iimas Balaam atak atinan pachis chichaak:
 “Amalecita ainaka araantusa iitai, tura ashi chikich ainan nagkasau senchirtin ainawai. Turasha iman akusha ashi ijiniam atinaiti”, tusa tinaiti.
- ²¹⁻²² Nuiyasha quenita ainan pachis atak atinan chichaak:
 Cañ weantu ainata:
 “Atumi jee pegker takasa umikmau akusha,
 tura muchignum ekeni jean shuar jeammaina numamtuk atum ajamaka uwemtai pegker ainakaisha
 Asirianmaya shuar aina atumin achirmak yarurmainak,
 jea pegker umikmau ainakaisha jijai ekemartin ainawai”, tusa tinaiti.
- ²³ Tura inagnamun Balaam atak atinan pachis chikichnasha chichaak:
 “¡Ayawa! ¿Yuus waittan ashammainan sukartustina nuisha yáki iwákusha pujutnaita?”
- ²⁴ Chiprenmaya barco ainajai suntar aina kaunkar Asirianmaya ainan, tura Heber weantu ainancha ashi ijinawartinaiti”, tusa tinaiti.
- ²⁵ Nuna tina ashi umik Balaam nina jeen waketkinaiti. Tura Balacsha nina jeen waketkinaiti.^e

Moisés Josué israelita ainan apuri atii tusa anaikamu

27 ¹² Yuus Moisésan chicharuk: Nain Abiram tutaiya ai wakata, tumam israelita ainan

nugkan susaruitaj nu iista. ¹³ Tumam nui wainkam, amesha amina yatsum Aarón jakauwa numamtuk jakam amina pataim ainajai iruuntrattame. ¹⁴ Atum jimartiram israelita aina aya nugkanmag nain Sinnum matsamsar kitamainak entsan seamainakaisha atumka wina chichamur umirtukchau ainarme, tusa tinaiti. ¹⁵ Tusa tama Moisés Yuusan chicharuk: ¹⁶⁻¹⁷ Wina apuru, ame etegkamu aina oveja nerennuri atsurmau asa, kuitamsacham matsammaina numamtuk matsamaraig, nitan yaigtin chikichik apu atin anaikata, tusa tinaiti. ¹⁸ Tutai Yuus Moisésan chicharuk: “Nuntan uchiri Josué, apu jas nina takamtikmain Wakan arawai. Tuma asamtai nina muuken uwejmijai antigta. ¹⁹ Turam sacerdote Eleazar pujamunam, tura ashi shuar aina emtin iwainakta. ²⁰ Turakum ashi Israel shuar aina chichaman umirkarti tusam apumtikam apujtsata. ²¹ Tura shuar ainan inartasa wakerakka sacerdote Eleazar pujamunam jeati. Tumamtai Eleazar Uriman egkea Yuus wari tawak tusa aujattui. Turamtai Yuus Eleazaran ujattawai. Nu turam Eleazar Yuus timaun pachis Josué tuke ujattawai, israelita ainanka Josué tu inatnaiti”, tusa tinaiti.

²² Moisés Yuus timauwa turusag umiak, Josué juki sacerdote Eleazar pujamunam ejénaiti. Tura ashi shuar aina emtincha iwainakuiti. ²³ Tura nuiyasha Yuus timaun umiak Moisés Josué muuknum achikuiti. Apu jas nita ainan yaigti tusa tura-waiti.

^e 24.25 2Pe 2.15-16